

四庫全書

史部

欽定四庫全書

史部

水經注釋卷二十三至五

詳校官監察御史 周元良

刑部郎中 許兆椿覆勘

總校官降調編修 倉聖脉

校對官編修 周與岱

謄錄監生 夏維朝

欽定四庫全書

水經注釋卷二十三

仁和趙一清撰

陰溝水 汭水 獲水

陰溝水出河南陽武縣滾蕩渠

陰溝首受大河於卷縣故瀆東南逕卷縣故城南又

東逕蒙城北史記秦莊襄王元年蒙驁擊取成臯蒙

陽初置三川郡疑即驁所築也於事未詳故瀆東分

為二世謂之陰溝水京相璠以為出河之濟又非所  
究俱東絕濟隧右瀆東南逕陽武城北又東南絕長  
城逕安亭北又東北會左瀆左瀆又東絕長城逕垣  
雍城南昔晉文公戰勝于楚周襄王勞之于此故春  
秋書甲午至于衡雍作王宮于踐土呂氏春秋曰尊  
天子於衡雝者也郡國志曰卷縣有垣雝城即史記  
所謂韓獻秦垣雝是也又東逕開光亭南又東逕清  
陽亭南又東合右瀆又東南逕封丘縣絕濟瀆東南

至大梁合滎蕩渠梁溝既開滎蕩渠故瀆實兼陰溝  
浚儀之稱故云出陽武逕大梁城北左屈與梁溝合  
俱東南流同受鴻溝沙水之目其川流之會左瀆東  
尊者即汜水也蓋津源之變名矣故經云陰溝出滎  
蕩渠者也

東南至沛為過水

陰溝始亂滎蕩終別於沙而過水出焉過水受沙水  
於扶溝縣爾雅曰過為洵郭景純曰大水溢出別為

小水也呂忱曰洵過水也過水逕大扶城西城之東  
北悉諸表舊墓碑宇傾低羊虎碎折唯司徒滂蜀郡  
太守騰博平令光碑宇所存唯此自餘殆不可尋過  
水又東南逕陽夏縣西又東逕邈城北城實中而西  
有環郭過水又東逕大棘城南故郟之大棘鄉也春  
秋宣公二年宋華元與鄭公子歸生戰于大棘獲華  
元左傳曰華元殺羊食士其御羊斟不與及戰曰疇  
昔之羊子為政今日之事我為政遂御入鄭故見獲

焉後其地為楚所并故園稱曰大棘楚地有楚太子  
建之墳及伍員釣臺池沼具存過水又東逕安平縣  
故城北陳留風俗傳曰大棘鄉故安平縣也士人敦  
蠢易以統御過水又東逕鹿邑城北世謂之虎鄉城  
非也春秋之鳴鹿矣杜預曰陳國武平西南有鹿邑  
亭是也城南十里有晉中散大夫胡均碑元康八年  
立過水之北有漢温令許續碑續字嗣公陳國人也  
舉賢良拜議郎遷温令延熹中立過水又東逕武平

縣故城北城之西南七里許有漢尚書令虞詡碑碑  
題云虞君之碑諱詡字定安虞仲之後為朝歌令武  
都太守文字多缺不復可尋按范曄漢書詡字升卿  
陳國武平人祖為縣獄吏治存寬恕嘗曰于公為里  
門子為丞相吾雖不及于公子孫未必不為九卿故  
字詡曰升卿定安蓋其幼字也魏武王初封於此終  
以武平華夏矣過水又東逕廣鄉城北圖稱曰襄邑  
有蛇丘亭故廣鄉矣改曰廣世後漢順帝陽嘉四年



封侍中摯填為侯國即廣鄉也過水又東逕苦縣西南分為二水枝流注于東北賴城入谷為死過也過水又東南屈逕苦縣故城南郡國志曰春秋之相也王莽更名之曰賴陵矣城之四門列築馳道東趙賴鄉南自南門越水直指故臺西面南門列道徑趣廣鄉道西門馳道西石武平北門馳道暨于北臺過水又東北屈至賴鄉西谷水注之谷水首受渙水于襄邑縣東東逕承匡城東春秋經書夏叔仲彭生會晉

郤缺于承匡左傳曰諸侯謀之從楚也

全氏曰傳文是謀諸侯之

從楚者今抄變作也字則其義乖矣

京相璠曰今陳留襄邑西三十里

有故承匡城谷水又東南逕巴吾縣故城西陳留風

俗傳曰縣故宋地雜以陳楚之地故梁國寧陵縣之

徙種龍鄉也以成哀之世戶至八九千冠帶之徒求

置縣矣永元十一年陳王削地以大棘鄉直陽鄉十

二年自隰隸之命以嘉名曰巴吾猶有陳楚之俗焉

谷水又東逕柘縣故城東地理志淮陽之屬縣也城

內有柘令許君清德頌石碎字紊唯此文見碑城西  
南里許有漢陽臺令許叔種碑光和中立又有漢故  
樂城陵令太尉掾許嬰碑嬰字虞鄉司隸校尉之子  
建寧元年立餘碑文字碎滅不復可觀當似司隸諸  
碑也谷水又東逕苦縣故城中水泛則四周隍塹耗  
則孤津獨逝谷水又東逕賴鄉城南其城實中東北  
隅有臺偏高俗以是臺在谷水北其城又謂之谷陽  
臺非也谷水自此東入過水過水又北逕老子廟東

廟前有二碑在南門外漢桓帝遣宦官管霸祠老子

命陳相邊韶撰碑

隸釋云老子銘篆額在亳州苦縣苦屬陳國故其丈陳相邊韶所作

碑云延熹八年八月帝夢老子尊而祀之帝紀此年春冬雨遣中常侍至苦祠老子水經載蒙城王子喬

碑亦云延熹八年八月帝遣使致祠國相王瑋乃銘紀遺烈蓋咸宗方修神僊之事故一時郡國並作碑

表此石立于延熹無疑杜子美云苦縣光和尚骨立誤也一清按注無立碑年月碑云延熹八年八月甲

子曰北有雙石闕甚整頓石闕南側魏文帝黃初三

年遷譙所勅闕北東側有孔子廟廟前有一碑西面

是陳相魯國孔疇建和三年立北則老君廟廟東院

中有九井焉又北過水之側又有李母廟廟在老子

廟北廟前有李母冢冢東有碑是永興元年譙令長

沙王阜所立碑云老子生于曲過間

一清按晉書地道記云曲仁里

老子也許慎又云過水首受淮陽扶溝縣蕩蕩渠不得

至沛方為過水也

全氏曰此二十五字疑是注首扶溝縣下之錯簡今次于此是不比

也過水又屈東逕相縣故城南其城卑小實中邊韶

老子碑又云老子楚相縣人也相縣虛荒今屬苦故

城猶存在賴游鄉之東過水處其陽疑即此城也自

是無郭以應之過水又東逕譙縣故城北春秋左傳  
僖公二十三年楚成得臣帥師伐陳遂取譙城頓而  
還是也王莽之延成亭也魏立譙郡沈州治沙水自  
南枝分北逕譙城西而北注過過水四周城側城南  
有曹蒿冢冢北有碑碑北有廟堂餘基尚存柱礎仍  
在廟北有二石闕雙峙高一丈六尺椽櫺及柱皆雕  
鏤雲炬上罩盪已碎闕北有圭碑題云漢故中常侍  
長樂太僕特進費亭侯曹君之碑延熹三年立碑陰

又刊詔策二碑文同夾碑東西列對兩石馬高八尺  
五寸石作粗掘不匹光武隧道所表象馬也有騰兒

冢冢東有碑題云漢故潁川太守曹君墓延熹九年

卒而不刊樹碑歲月

一清按魏志曹仁傳裴松之註  
引魏書曰仁祖襄潁川太守斯

其人墳北有其元子熾冢冢東有碑題云漢故長水

校尉曹君之碑歷太中大夫司馬長史侍中遷長水

年三十九卒熹平六年造熾弟脩冢冢東有碑題云

漢謁者曹君之碑熹平六年立城東有曹太祖舊宅

所在負郭對廛側隍臨水魏書曰太祖作議郎告疾  
歸鄉里築室城外春夏習讀書傳秋冬射獵以自娛  
樂文帝以漢中平四年生於此上有青雲如蓋終日  
乃解卽是處也後文帝以延康元年幸譙大饗父老  
立壇於故宅壇前樹碑碑題云大饗之碑碑之東北  
過水南有譙定王司馬士會冢冢前有碑晉永嘉三  
年立碑南二百許步有兩石柱高丈餘半下為束竹  
交文作制工巧石榜云晉故使持節散騎常侍都督



揚州江州諸軍事安東大將軍譙定王河內溫司馬  
公墓之神道過水又東逕朱龜墓北東南流冢南枕  
道有碑碑題云漢故幽州刺史朱君之碑龜字伯靈  
光和六年卒官故吏別駕從事史右北平無終年化  
中平二年造碑陰刊故吏姓名悉薊涿及上谷北平

等人

隸釋云漢幽州刺史朱君之碑有陰在毫州朱君名龜石有碎落不能詳其官闕其可考者當

以御史中丞督捕益州蠻又為幽州刺史禦鮮卑爾靈帝光和六年卒後漢西南夷傳云蜀郡諸夷反執太守雍陟遣御史中丞朱龜討之不能  
魁李顯發板橋蠻平之碑所載與傳合

過水東南逕

層丘北丘阜獨秀巍然介立故壁壘所在也過水又  
東南逕城父縣故城北沙水枝分注之水上承沙水  
於思善縣世謂之漳水故有漳頭之名也東北流逕  
城父縣故城西側城東北流入於過過水又東逕下  
城父北郡國志曰山桑縣有下城父聚者也過水又  
屈逕其聚東郎山西又東南屈逕郎山南山東有垂  
惠聚世謂之禮城泰山松郡國志曰山桑縣有垂惠  
聚卽此城也過水又東南逕過陽城北臨側過水魏

太和中為州治

一清按案字記云後魏孝文帝置渦州理山桑城其地後入于梁復入魏

改為譙州改譙縣為渦陽縣州治上疑落渦字

以蓋表為刺史後罷州立郡

衿帶竭戍過水又東南逕龍亢縣故城南漢建武十

三年世祖封傅昌為侯國

沈氏曰按本傳昌由昆陽徙蕪湖不聞為龍亢也

故語曰沛國龍亢至山桑者也

庾林曰關駟十三州志曰山桑縣人俗貪

偽好持馬鞭行邑故語曰沛國龍亢至山桑詐託旅使若奔喪道過寇抄遂失資糧酈氏取其一語殊為

不過水又屈而南流出石梁梁石崩褫夾岸積石高

二丈水歷其間又東南流逕荆山而東流注也

又東南至下邳淮陵縣入于淮

過水又東左合北肥水肥水出山桑縣西北澤藪東南流左右翼佩數源異出同歸蓋微脈涓注耳東南流逕山桑邑南俗謂之北平城昔文欽之封山桑侯疑食邑於此城東南有一碑碑文悉破無驗唯碑背故吏姓名尚存熹平元年義士門生沛國蕭縣劉定興立北肥水又東逕山桑縣故城南俗謂之都亭城非也今城內東側猶有山亭築立陵阜高峻非洪臺

所擬十三州志所謂山生於邑其庭有桑因以氏縣  
者也郭城東有文穆冢碑三世二千石穆郡戶曹史

徵試博士太常丞以明氣候擢拜侍中右中郎將遷

九江彭城陳留四郡

一清按所歷止三郡四字  
疑誤抑或脫失一郡也

光和

中卒故吏涿郡太守彭城呂虔等立北肥水又東積  
而為陂謂之瑕陂陂水又東南逕瑕城南春秋左傳  
成公十六年楚師還及瑕即此城也故京相璠曰瑕  
楚地北肥水又東南逕向縣故城南地理志曰故向

國也世本曰許州向甲姜姓也炎帝後京相璠曰向  
沛國縣今并屬譙國龍亢也杜預曰龍亢縣東有向  
城漢世祖建武十三年更封富波侯王霸為侯國即  
此城也俗謂之圓城非又東南逕義城南世謂之楮

城非

一清按渠水篇經云又東南經過義成縣西南  
入于淮此篇注云過水受沙水東南流逕荆山

左合北肥水又東注于淮今鳳陽府懷遠縣東北十  
五里有渦口城又東北四十五里有向城即過水入  
淮之處與漢志合故道元以經言下邳睢陵入淮為  
非此義城即沛郡之義成縣胡謂云義成故城今名  
拖城顧祖禹云過口城今訛為菴城過菴音  
韻睽而注人有楮城之目殆字形之變耳

又東入

于過過水又東注淮經言下邳淮陵入淮誤矣

汭水出陰溝于浚儀縣北

陰溝即蕩蕩渠也亦言汭受旃然水又云丹沁亂流於武德絕河南入滎陽合汭故汭兼丹水之稱河濟水斷汭承旃然而東自王賁灌大梁水出縣南而不

逕其北

一清按漢志河南郡滎陽縣下水馮池皆在西南

夏水洪泛則是瀆

津通故渠即陰溝也於大梁北又曰浚水矣故圈稱著陳留風俗傳曰浚水逕其北者也又東汭水出焉

故經云汭出陰溝於浚儀縣北也

一清按禹貢錐指曰浮于淮泗達于

河蕪氏傳曰自淮泗入河必道于汭世謂隋煬帝始通汭入泗禹時無此水道以疑禹貢之言按漢書項羽與漢約中分天下割鴻溝以西為漢以東為楚文穎注云於滎陽下引河東南為鴻溝以通宋鄭陳蔡曹衛與濟汝淮泗會即今官渡是也魏武與袁詔相持於官渡乃楚漢分裂之處蓋自秦漢以來有之安知非禹迹耶禹貢九州之水皆記入河水道而淮泗獨不能入河帝都所在理不應爾意其必開此道以通之其後或為鴻溝或為官渡或為汭上下百餘里間不可必然皆引河水而注之淮泗也故王濬伐吳杜預與之書曰足下徑取秣陵自江入淮逾于泗汭汭河而上振旅還都濬舟師之盛古今絕倫而自泗汭汭河可以班師則汭水之大小當不減于今又足以見秦漢魏晉皆有此水道非煬帝創開也吳王夫



差闕溝通水與晉會于黃池而江始有入淮之道禹  
時則無之故禹貢曰沿于江海達于淮泗明非自海  
入淮則江無入淮之道今直云浮于淮泗達于河不  
言自海則鴻溝官渡汴水之類自禹以來有之明矣  
按蘇氏因說者有謂河當作荷而以為不必然故發  
此論閻百詩曰禹貢濟入于河南溢而為滎而陶  
丘而荷而沃而海此禹時之濟潰發源注海也史記  
河渠書禹功施乎三代自是之後滎陽下引河東南  
為鴻溝以通宋鄭陳蔡曹衛與濟汝淮泗會此禹後  
代人於滎澤之北引河東南流故水經謂河水東過  
滎陽縣蕩蕩渠出焉者是亦引濟水分流故漢志謂  
滎陽有蕩蕩渠首受濟東南流者是又自是之後代  
有疏濬枝津別瀆不可勝數則酈注所謂滎波河濟  
往復逕通者也雖然其來古矣蘓秦說魏襄王曰夫  
王之地南有鴻溝則戰國前有之晉楚之戰楚軍于  
邲邲即汜水則春秋前有之爾雅水自河出為澗澗

木汲水則爾雅前有之然莫不善于酈道元之言曰  
大禹塞滎澤滎澤莽莽時方枯豈禹塞之乎又曰昔禹  
塞其淫水而于滎陽下引河滎陽非禹引而謂禹之  
時已有乎尔是以斷自河渠書參以滎陽下引河不  
見禹貢之書為出禹之後頗自幸其考訂比蕪氏差  
詳矣按河渠書有自是之後四字百詩據此判鴻溝  
非禹迹真老史斷獄手而愚更有進者謂由泗入荷  
由荷入濟是矣而自陶丘以西舍鴻溝無達河之道  
也焉得不指為禹迹乎謂滎陽下引河出禹以後是  
也而由濟達河莫知其所經不顯示以一塗終何以  
破千古之疑乎是當于濟潔之間求之蓋兗青徐揚  
之貢道皆由濟入潔以達河而宋儒謂濟潔二水無  
相通之處則浮濟者沂陶丘而西且北勢不得不出  
于滎陽此蕪氏之論所以近理而人不敢深折其非  
也誠知經所謂浮於濟者乃至荷會汶之濟而非陶  
丘滎澤之濟則濟之所以通河者潔也非鴻溝官渡

汴水也而紛紜之說不攻自破矣又曰黃丈叔云蕞蕩出河斷非禹迹禹之行河本以河惴悍難行平地故醜二渠以引河而載之高地二渠非得已也後世不識聖人之意妄鑿河為瀆或不順地助或附屬不理孫故其勢易決蓋非獨蕞蕩也其下漢水通河而酸棗決鉢水通河而斛子決汴渠亦屢決至王景治汴鑿山開湖十里置水門使更相回注紊亂渠脈而禹迹益壞矣且所為通淮泗者以舟楫之利也荷已通矣而何更用通蕞蕩哉其曰禹塞淫水而鑿之者春秋戰國之世商榷功利而忽遠圖並植私欲而不顧大經策謀之士託其名于禹而世不察也河渠書云滎陽下引河東南為鴻溝以通宋鄭陳蔡曹衛與濟汝淮泗會其在春秋戰國之際明矣偉哉此論善發禹貢之蘊井可以證徐州達于河之誤

汴水

東逕倉垣城南即大梁縣

一清按漢志陳留郡浚儀縣下云故大梁續志亦云

浚儀本大梁是宋嘗以大梁名縣也之倉垣亭也城臨汜水陳留相畢

邈治此征東將軍荀晞之西也邈走歸京晞使司馬東萊王讚代據倉垣斷留運漕汜水又東逕陳留縣之鉞鄉亭北陳留風俗傳所謂縣有鉞鄉亭即斯亭也汜水又逕小黃縣故城南神仙傳稱靈壽光扶風人死于江陵胡罔家罔殯埋之後百餘日人有見光於此縣寄書於罔罔發視之唯有履存汜水又東逕鳴雁亭南春秋左傳成公十六年衛侯伐鄭至于鳴

雁者也杜預釋地云在雍丘縣北今俗人尚謂之為  
白雁亭汭水又東逕雍丘縣故城北逕陽樂城南西  
征記曰城在汭北一里周五里雍丘縣界汭水又東  
有故渠出焉南通睢水謂之董生決或言董氏作亂  
引水南通睢水故斯水受名焉今無水汭水又東枝  
津出焉俗名之為洛架口西征記曰洛架水名也續  
述征記曰在董生決下二里汭水又逕外黃縣南又  
東逕莠倉城北續述征記曰莠倉城去大游墓二十

里又東逕大齊城南陳留風俗傳曰外黃縣有大齊亭又東逕科城北陳留風俗傳曰縣有科稟亭是則科稟亭也汧水又東逕小齊城南汧水又南逕利望

亭南風俗傳曰故曰成安也地理志曰陳留舊名一

按舊名當漢武帝以封韓延年為侯國全氏曰按小作縣名

鄭志則在陳留蓋疑未能決也予謂延年鄭人則潁川之鄭是也以為陳留非也善長亦據本志言之耳一清按地理志潁川郡本有成安縣分註云侯國也而小司馬以陳留之成安當之道元則又兩釋之而不知也

汧水又東龍門故瀆出焉瀆舊通睢水故西征

記曰龍門水名也門北有土臺高三丈餘上方數十步汲水又東逕濟陽考城縣故城南為菑獲渠考

城縣周之采邑也於春秋為戴國矣左傳隱公十年

秋宋衛蔡伐戴是也漢高帝十一年秋封彭祖為侯

國

一清按索隱曰漢表彭祖姓秘音鬱韋昭音符篋反非也今檢史記諸本並作秘今見有姓秘氏

陳留風俗傳曰秦之穀縣也後遭漢兵起邑多災年

故改曰菑縣王莽更名嘉穀

一清按道元此說非也漢書傳寬傳畧梁別西

擊邪說軍菑南破之師古曰菑縣名也後為考城則秦時已名菑縣非自漢始蓋因王莽更為嘉穀而造

作是說 章帝東巡過縣詔曰陳留菑縣其名不善高祖

鄙柏人之邑世宗休聞喜而顯獲嘉應吉亨之符嘉  
皇靈之顧賜越有光烈考武皇其改菑縣曰考城是  
瀆蓋因縣以獲名矣汜水又東逕寧陵縣之沙陽亭  
北故沙隨國矣春秋左傳成公十六年秋會于沙隨謀  
伐鄭也杜預釋地曰在梁國寧陵縣北沙陽亭是也  
世以為堂城非也汜水又東逕黃蒿塢北續述征記  
曰堂城至黃蒿二十里汜水又東逕斜城下續述征



記曰黃蒿到斜城五里陳留風俗傳曰考城縣有斜  
亭汲水又東逕周塢側續述征記曰斜城東三里晉  
義熙中劉公遣周超之自彭城綠汲故溝斬樹穿道  
七百餘里以開水路停薄于此故茲塢流稱矣汲水  
又東逕葛城故葛伯之國也孟子曰葛伯不祀湯問  
曰何為不祀稱無以供祠祭遺葛伯葛伯又不祀湯  
又問之曰無以供犧牲湯又遺之又不祀湯又問之  
曰無以供棗盛湯使亳衆往為之耕老弱饋食葛伯

又率民奪之不授者則殺之湯乃伐葛葛於六國屬

魏魏襄以封公子無忌號信陵君

朱氏謀埠箋云史記云魏公子無忌

者魏昭王少子而魏安釐王異母弟也昭王薨安釐王即位封公子為信陵君此云襄王誤也其地

葛鄉即是城也在寧陵縣西四十里汧水又東逕神

垆塢又東逕夏侯長塢

一清按三國志魏武帝紀表術退保封邱遂圍之未合術

走襄邑追到太壽決渠水灌城走寧陵又追之走九江太壽地無考大約在寧陵襄邑之間又夏侯惇傳領陳留濟陰太守惇乃斷太壽水作陂身自負土率將士勸種稻民賴其利此夏侯長塢蓋以惇得名

續述征記曰夏侯塢至周塢各相距五里汧水又東

逕梁國睢陽縣故城北而東歷襄鄉塢南續述征記  
曰西去夏侯塢二十里東一里即襄鄉浮圖也汜水  
逕其南漢熹平中某君所立死因葬之其弟刻石樹  
碑以旌厥德隧前有師子天鹿累博作百達柱八所  
荒蕪頽毀凋落畧盡矣

又東至梁郡

一清按漢志秦碭郡高帝五年為梁國續志同作經者乃改云梁郡此與陳縣漢相

王君造四縣碑以淮陽國為淮陽郡正相類後獲水睢水經文亦云

蒙縣為睢水餘波

南入睢陽城中

卷之三十三  
三  
汲水又東逕貫城南俗謂之薄城非也關駟十三州  
志以為貫城也在蒙縣西北春秋僖公二年齊侯宋  
公江黃盟于貫杜預以為貫也云貫貫字相似貫在  
齊謂貫澤也是以非此也今於此地更無他城在蒙  
西北唯是邑耳考文準地貫邑明矣非毫可知一清按毫  
與上薄字同看汲水又東逕蒙縣故城北俗謂之小蒙城也  
西征記城在汲水南十五六里即莊周之本邑也為  
蒙之漆園吏郭景純所謂漆園有傲吏者也悼惠施

之沒杜門於此邑矣汲水自縣南出今無復有水唯  
睢陽城南側有小水南流入于睢城南二里有漢太  
傅掾橋載墓碑載字元賓梁國睢陽人也睢陽公子  
熹平五年立城東百步有石室刊云漢鴻臚橋仁祠  
城北五里有石虎石柱而無碑誌不知何時建也汲  
水又東逕大蒙城北自古不聞有二蒙疑即蒙亳也  
所謂景亳為北亳矣椒舉云商湯有景亳之命者也  
關駟曰湯都也亳本帝嚳之墟在禹貢豫州河洛之

間今河南偃師城西二十里尸鄉亭是也皇甫謐以  
為考之事實學者失之如孟子之言湯居亳與葛為  
隣是即亳與葛比也湯地七十里葛又伯耳封域有  
限而寧陵去偃師八百里不得童子饋餉而為之耕  
今梁國自有二亳南亳在穀熟北亳在蒙非偃師也  
古文仲虺之誥曰葛伯仇餉征自葛始即孟子之言  
是也崔駰曰湯冢在濟陰薄縣北皇覽曰薄城北郭  
東三里平地有湯冢四方各十步高七尺上平也

漢哀帝建平元年大司空史郤長卿按行水災因行  
湯冢在漢屬扶風今徵之迴渠亭有湯池徵陌是也

全氏曰按漢志徵屬  
左馮翊不屬右扶風

然不經見難得而詳按秦寧公

本紀云二年伐湯三年與亳戰亳王奔戎遂滅湯然  
則周桓王時自有亳王號湯為秦所滅乃西戎之國  
葬于徵者也非殷湯矣劉向言殷湯無葬處為疑杜  
預曰梁國蒙縣北有薄伐城城中有成湯冢其西有  
箕子冢今城內有故冢方墳疑即杜元凱之所謂湯

冢者也而世謂之王子喬冢冢側有碑題云仙人王子喬碑曰王子喬者蓋上世之真人聞其仙不知興何代也博問道家或言潁川或言產蒙初建此城則有斯邱傳承先民曰王氏墓暨于永和之元年冬十二月當臘之時夜上有哭聲其音甚哀附居者王伯怪之明則登而察焉時天鴻雪下無人徑有大鳥跡在祭祀處左右咸以為神其後有人著大冠絳單衣杖竹立冢前呼採薪孺子伊永昌曰我王子喬也勿



得取吾墳上樹也忽然不見時令泰山萬熹稽故老  
之言感精瑞之應乃造靈廟以休厥神於是好道之  
儔自遠方集或絃琴以歌太一或譚思以歷丹田知  
至德之宅兆實真人之祖先延熹八年秋八月皇帝  
遣使者奉犧牲致禮祠濯全氏曰隸釋改  
作祇懼非是之敬肅如  
也國相東萊王璋字伯儀以為神聖所興必有銘表  
乃與長史邊乾遂樹之元石紀頌遺烈觀其碑文意  
似非遠既在經見不能不書存焉

獲水出汭水於梁郡蒙縣北

漢書地理志曰獲水也十三州志曰首受菑獲渠一清

按漢志梁國蒙縣獲水首受菑獲渠汭水注云汭水又東逕濟陽考城縣故城南為留獲渠道元是注蓋

割裂班志又雜引闕說以成文殆好博之過也亦兼丹水之稱也竹書紀年

曰宋殺其大夫皇瑗于丹水之上又曰宋大水丹水

壅不流蓋汭水之變名也獲水自蒙東出水南有漢

故繹幕令匡碑匡字公輔魯府君之少子也碑字碎

落不可尋識竟不知所立歲月也獲水又東逕長樂

固北已氏縣南東南流逕于蒙澤十三州志曰蒙澤  
在縣東春秋莊公十二年宋萬與公爭博殺閔公於  
斯澤矣獲水又東逕虞縣故城北古虞國也昔夏少  
康逃奔有虞為之庖正虞思於是妻之以二姚者也  
王莽之陳定亭也城東有漢司徒盛允墓碑允字伯  
世梁國虞人也其先奭氏至漢中葉避孝元皇帝諱  
改姓曰盛世濟其美以迄于公察孝廉除郎累遷司  
空司徒延熹中立墓中有石廟廟宇傾頽基構可尋

獲水又東南逕空桐澤北澤在虞城東南春秋哀公

二十六年冬宋景公遊于空澤辛巳卒于連中大尹

左師興空澤之士千甲奉公自空桐入如沃宮者矣

獲水又逕龍譙國

一清按龍譙國未詳寰宇記亳州下云後漢熹平五年黃龍見譙太

史令單颺以為其國當有王者興不及五十年亦當復見後如其言及文帝即位黃初元年以先人舊都立為譙國與長安許昌鄴洛陽號為五都事見後漢書方術傳及三國志魏文帝紀熹平之朝譙尚為縣屬沛國占侯者即云其國若豫知當塗受命改制之事史氏多誣此其驗矣

又東合黃水

口水上承黃陂下注獲水獲水又東入櫟林世謂之

九里柞獲水又東南逕下邑縣故城北楚考烈王滅

魯頃公亡遷下邑又楚漢彭城之戰呂后弟周

全氏曰按

項羽本紀云呂后兄高帝紀亦云呂后兄弟非弟也且是周呂侯名澤周呂其封國非名周也

軍於

下邑高祖敗還從周軍子房肇捐地之策收垓下之師陸機所謂即謀下邑者也王莽更名下洽矣獲水

又東逕碭縣故城北應劭曰縣有碭山山在東出文

石秦立碭郡蓋取山之名也王莽之節碭縣也山有

梁孝王墓其冢斬山作郭穿石為藏行一里到藏中

有數尺水水有大鯉魚黎萌謂藏有神不敢犯之凡到藏皆潔齊而進不齊者至藏輒有獸噬其足獸難得見見者云佻狗所未詳也山上有梁孝王祠獲水又東穀水注之水上承碣陂陂中有香城城在四水之中承諸陂散流謂零水瀼水清水也積而成潭謂之碣水趙人有琴高者以善鼓琴為康王舍人行彭涓之術浮游碣郡間二百餘年後入碣水中取龍子與弟子期曰皆潔齊待於水傍設屋祠果乘赤鯉魚

出入坐祠中碣中有千萬人觀之留月餘復入水也

陂水東注謂之穀水東逕安山北即碣北山也山有

陳勝墓觀秦亂首兵伐秦弗終厥謀死葬於碣蓋曰

隱王也穀水又東北注于獲水獲水又東歷藍田鄉

郭又東逕梁國杼秋縣故城南王莽之子秋也獲水

又東歷

一清按下有脫文

洪溝水注之水南北各一溝溝首

對獲世謂之鴻溝非也春秋昭公八年秋蒐于紅杜

預曰沛國蕭縣西有紅亭即地理志之埶縣

一清按此說亦

見晉書地道記而顧景范非之郡國志泰山郡奉高邑劉昭補註曰左傳昭八年大蒐于紅紅亭在縣西

北漢志沛郡埶縣莽曰貢師高后三年楚元王子富古曰埶亦音貢音義並異

為侯國朱氏謀埶箋云王子侯表景帝三年更封富為紅侯作高后誤一清按索隱曰楚元王傳

休侯富免後封紅侯紅休蓋二鄉名王莽封劉歆為紅休侯一云紅即虹縣王莽之所謂

貢矣蓋溝名是同非楚漢所分也全氏曰鴻溝史記年表作洪渠漢書

音義作鴻溝晉志浚儀縣下亦作洪溝則鴻洪字本通故有指此洪溝為鴻溝者善長特起而糾正之

### 又東過蕭縣南睢水北流注之

蕭縣南對山世謂之蕭城南山也戴延之謂之同孝



山云取漢陽城侯劉德所居里名目山也劉澄之云  
縣南有昌山未詳孰是也山有箕谷谷水北流注獲  
世謂之西流水言水上承梧桐陂陂水西流因以為  
名也余嘗逕蕭邑城右唯是水北注獲更無別水疑  
即經所謂睢水也城東西及南三面臨側獲水故沛  
郡治縣亦同居矣城南舊有石橋耗處積石為梁高  
二丈今荒毀殆盡亦不具誰所造也縣本蕭叔國宋  
附庸楚滅之春秋宣公十二年楚伐蕭蕭潰申公巫

臣曰師人多寒王巡三軍拊而勉之三軍之士皆同  
挾纊蓋恩使之然矣蕭女娉齊為頃公之母卻克所  
謂蕭同叔子也獲水又東歷龍城不知誰所創築也  
獲水又東逕同孝山北山陰有楚元王冢上圓下方  
累石為之高十餘丈廣百許步經十餘墳悉結石也  
獲水又東淨淨溝水注之水上結梧桐陂西北流即  
劉中書澄之所謂白溝水也又北入于獲俗名之曰  
淨淨溝也

又東至彭城縣北東入于泗

獲水自淨淨溝東逕阿育王寺北或言楚王英所造  
非所詳也蓋遵育王之遺法因以名焉與安陂水合  
水上承安陂餘波北逕阿育王寺側水上有梁謂之  
元柱橋水傍有石墓宿經開發石作工竒殊為壯構  
而不知誰冢疑即澄之所謂凌冢也水北流注于獲  
獲水又東逕彌黎城北劉澄之水初記所謂城之西  
南有彌黎城者也獲水於彭城西南迴而北流逕彭

城城西北舊有楚大夫龔勝宅即楚老父哭勝處也  
獲水又東轉逕城北而東注泗水北三里有石冢被  
開傳言楚元王之孫劉向冢未詳是否城即殷大夫  
老彭之國也於春秋為宋地楚伐宋并之以封魚石  
崔子季珪述初賦曰想黃公於邳圯勤魚石於彭城即  
是縣也孟康曰舊名江陵為南楚陳為東楚彭城為  
西楚文穎曰彭城故東楚也項羽都焉謂之西楚漢  
祖定天下以為楚郡封弟交為楚王都之宣帝地節

元年更為彭城郡王莽更之曰和樂也徐州治城內  
有漢司徒袁安魏中郎將徐庶等數碑並列植於街  
右咸曾為楚相也大城之內有金城東北小城劉公  
更開廣之皆壘石高四丈列塹環之小城西又有一  
城是大司馬琅琊王所修因項羽故臺經始即構宮  
觀門閣惟新厥制義熙十二年霖雨驟澍汴水暴長  
城遂崩壞冠軍將軍彭城劉公之子也登更築之悉  
以埽壘宏壯堅峻樓櫓赫奕南北所無宋平北將軍

徐州刺史河東薛安都舉城歸魏魏遣博陵公尉苟仁城陽公孔伯恭援之邑閭如初觀不異昔自後毀

撤一時俱盡

一清按此處疑有脫文魏書堯暄傳初

往往毀撤由是吏損落及高祖幸彭城開之曰暄猶可斬間遺工雕鏤尚存龍雲

逞勢奇為精妙矣城之東北角起層樓於其上號曰

彭祖樓地理志曰彭城縣古彭祖國也世本曰陸終之子其三曰篋是為彭祖彭祖城是也下曰彭祖冢彭祖長年八百綿壽永世於此有冢蓋亦元極之化

矣其樓之側衿阪帶泗東北為二水之會也聳望川  
原極目清野斯為佳處矣

水經注釋卷二十三



欽定四庫全書

水經注釋卷二十四

仁和趙一清撰

睢水 瓠子水 汶水

睢水出梁郡鄆縣

睢水出陳留縣西菴蕩渠東北流地理志曰睢水首受陳留浚儀菴蕩水也經言出鄆非矣又東逕高陽故亭北俗謂之陳留北城非也蘇林曰高陽者陳留

北縣也按在留故鄉聚名也有漢廣野君廟碑延熹

六年十二月雍丘令董生

何氏曰隸釋作董之乃董  
督之義一清按斯言未安

仰餘徽於千載遵茂美於絕代命縣人萇照為文用

章不朽之德其畧云輟洗分餐諮謀帝猷陳鄭有涿

鹿之功海岱無牧野之戰大康華夏綏靖藝物生民

以來功盛莫崇今故宇無聞而單碑介立矣陳留風

俗傳曰酈氏居於高陽沛公攻陳留縣酈食其有功

封高陽侯

全氏曰按食其生前未嘗封  
侯是因其子高梁侯齊而誤

有酈峻字丈

山官至公府掾大將軍商有功食邑于涿故自陳留  
徙涿縣有餅亭鄉建武二年世祖封王常為侯國也  
一清按王常封山桑侯不聞在陳留  
也豈由鄉亭進封而史傳失之乎 睢水又東逕雍

丘縣故城北縣舊祀國也殷湯周武以封夏后繼禹  
之嗣楚滅杞秦以為縣園稱曰縣有五陵之名故以  
氏縣矣城內有夏后祠昔在二代享祀不輟秦始皇  
圍築其表為大城而以縣焉睢水又東水積成湖俗  
謂之白羊陂陂方四十里右則姦梁陂水注之其水

上承陂水東北逕雍丘城北又東分為兩瀆謂之雙溝俱入白羊陂陂水東合洛架水口水上承汜水謂之洛架水東南流入于睢水睢水又東逕襄邑縣故城北又東逕雍丘城北睢水又東逕寧陵縣故城南故葛伯國也王莽改曰康善矣歷鄆縣北二城南北相去五十里故經有出鄆之文城東七里水次有單父令楊彥尚書郎楊禪字文節兄弟二碑漢光和中立也

又東過睢陽縣南

睢水又東逕橫城北春秋左傳昭公二十一年樂大  
心豐愆華恇禦華向于橫杜預曰梁國睢陽縣南有  
橫亭今在睢陽縣西南世謂之光城蓋光橫聲相近  
習傳之非也睢水又逕新城北即宋之新城亭也春  
秋左傳大公十四年公會宋公陳侯衛侯鄭伯許男  
曹伯晉趙盾盟于新城者也睢水又東逕高鄉亭北  
又東逕亳城北南亳也即湯所都矣睢水又東逕睢

陽縣故城南周武王封微子啟于宋以嗣殷後為宋

都也

一清按尚書序史記周本紀宋微子世家皆云周公承成王命以封微子于宋注云武王誤也

昔宋元君夢江使乘輜車被繡衣而謁於元君元君感衛平之言而求之于泉陽男子余且獻神龜於此矣秦始皇二十二年以為碭郡漢高祖嘗以沛公為

碭郡長天下既定五年為梁國

全氏曰閭若璩云睢陽是梁都而班志置

之第八其第一縣乃碭也按秦立碭郡則碭縣乃秦之治所及漢改治睢陽孟堅或仍秦地圖之舊而未及改文帝十二年封少子武為梁王太后之愛子景正耳

帝寵弟也是以警衛貂侍飾同天子歲珍積寶多擬  
京師招延豪傑士咸歸之長卿之徒免官來遊廣睢  
陽城七十里大治宮觀臺苑屏榭勢並皇居其所經  
構也役夫流唱必曰睢陽曲創傳由此始也城西門  
即寇先鼓琴處也先好釣居睢水傍宋景公問道不  
告殺之後十年止此門鼓琴而去宋人家奉事之  
南門曰盧門也春秋華氏居盧門里叛杜預曰盧門  
宋城南門也司馬彪郡國志曰睢陽縣有盧門亭城

內有高臺甚秀廣巍然介立趨焉獨上謂之蠡臺亦  
曰升臺焉當昔全盛之時故與雲霞俱遠矣續述征  
記曰迴道似蠡故謂之蠡臺非也余按闕子稱宋景  
公使工人為弓九年乃成公曰何其遲也對曰臣不  
復見君矣臣之精盡於弓矣獻弓而歸三日而死景  
公登虎園之臺援弓東面而射之矢踰于西霜之山  
朱氏謀埠箋曰藝文類聚作孟霜之山 集于彭城之東餘勢逸勁猶飲  
羽于石梁然則蠡臺即是虎園臺也蓋宋世宰虎所



在矣晉太和中大司馬桓溫入河命豫州刺史袁真  
開石門鮮卑堅戍此臺真頓甲堅城之下不果而還  
蠡臺如西又有一臺俗謂之女郎臺臺之西北城中  
有涼馬臺臺東有曲池池北列兩釣臺水周六七百  
步蠡臺直東又有一臺世謂之雀臺也城內東西道  
北有晉梁王妃王氏陵表並列二碑碑云妃諱祭字  
女儀東萊曲城人也齊北海府君之孫司空東武景  
侯之季女咸熙元年嬪于司馬氏泰始二年妃于國

太康五年薨營陵于新蒙之

朱氏諱瑋箋云此下疑有脫誤

太康九

年立碑東即梁王之吹臺也臺陞階礎尚在今建追  
明寺故宮東即安梁之舊地也廣周五六百步水列  
釣臺池東又有一臺世謂之清冷臺北城憑隅又結  
一池臺晉灼曰或說平臺在城中東北角亦或言兔  
園在平臺側如淳曰平臺離宮所在今城東二十里  
有臺寬廣而不甚極高俗謂之平臺余按漢書梁孝  
王傳稱王以功親為大國築東苑方三百里廣睢陽

城七十里大治宮室為複道自宮連屬於平臺三十餘里複道自宮東出楊門之左楊門即睢陽東門也連屬於平臺則近矣屬之城隅則不能是知平臺不在城中也梁王與鄒枚司馬相如之徒極游於其上故齊隨郡王山居序所謂西園多士平臺盛賓鄒馬之客咸在伐木之歌屢陳是用追芳昔娛神遊千古故亦一時之盛事謝氏賦雪亦曰梁王不悅遊于兔園今也歌堂淪宇律管埋音孤基塊立無復曩日之

望矣城北五六里便得漢太尉橋元墓冢東有廟即  
曹氏孟德親酌處操本微素嘗候于元元曰天下將  
亂能安之者其在君乎操感知已後經元墓祭云操  
以頑質見納君子士死知己懷此無忘又承約言徂  
沒之後路有經由不以斗酒隻雞過相沃酌車過三  
步腹痛勿怨雖臨時戲言非至親篤好胡肯為此辭  
哉悽愴致祭以申宿懷冢列數碑一是漢朝羣儒英  
才哲士感橋氏德行之美乃共刊石立碑以示後世

一碑是故吏司徒博陵崔烈廷尉河南吳整等以為  
至德在已揚之由人苟不矯述夫何舍焉乃共勒嘉  
石昭明芳烈一碑是隴西枹罕北次陌碭守長隲為  
為左尉漢陽獮道趙馮孝高以橋公嘗牧涼州感三  
綱之義慕將順之節以為公之勲美宜宣舊邦乃樹  
碑頌以昭令德光和元年主記掾李友字仲僚作碑  
文碑陰有右鼎文建寧三年拜司空又有中鼎文建  
寧四年拜司徒又有左鼎文光和元年拜太尉鼎銘

大曰故臣門人相與述公之行咨度體則文德銘于  
三鼎武功勒于征鉞書于碑陰以昭光懿又有鉞文  
稱是用鑱石假象作茲征鉞軍鼓陳之于東階亦以

昭公之文武之勲焉

隸辨曰按後漢書橋元傳光和六年卒蔡邕集太尉橋公碑有

二俱云光和七年蕘水經注謂是碑作于光和元年恐誤也其載鼎銘文云文德銘于三鼎云云乃是蔡邕橋公碑中語非鼎銘文也邕有東中西鼎三銘見于集中又有黃戊銘銘所云鉞文稱是用鑱石假象作茲征鉞亦邕銘中語而謂碑文為李友所作豈後人搜采邕集誤入他人之文耶

廟南列二

石柱柱東有二石羊羊北有二石虎廟前東北有二

石駝駝西北有二石馬皆高大亦不甚雕毀惟廟顏  
構粗就遺塘石鼓仍存鉞今不知所在睢水於城之  
陽積而為逢洪陂陂之西南有陂又東合明水水上  
承城南大池池周千步南流會睢謂之明水絕睢注  
渙睢水又東南流歷于竹圃水次綠竹蔭渚菁菁實  
望世人言梁王竹園也

太平御覽引水經注曰睢陽有隕石水一名漆溝左傳云

隕石于宋五隕星也故老云此水有時竭洞睢水又

五石存焉故名隕石水墜處為津今本無之

東逕穀熟縣故城北睢水又東蘄水出焉睢水又東

逕粟縣故城北地理志曰侯國也王莽曰成富睢水

又東逕太丘縣故城北地理志曰故敬丘也漢武帝

元朔三年封魯恭王子節侯劉政為侯國

朱氏謀璋箋曰漢書

王子侯表魯共王子政封瑕丘地理志瑕丘屬山陽郡而敬丘即太丘屬沛郡注似誤引也一清按鄆氏所言未可非也地理志山陽郡瑕丘下不云侯國沛郡敬丘下云侯國侯表中無敬丘侯安知道元所見

之本不漢明帝更從今名列仙傳曰仙人文賓邑作敬丘乎

人賣鞞履為業以正月朔日會故媼于鄉亭西社教令服食不老即此處矣睢水又東逕芒縣故城北漢



高帝六年封郟跖為侯國王莽之博治也世祖改曰  
臨睢城西二里水南有豫州從事皇毓碑殞身州牧  
陰君之罪時年二十五臨睢長平與李君二千石承  
輪氏夏文則高其行而悼其殞州國咨嗟旌閭表墓  
昭序令德式示後人城內有臨淮長左馮翊王君碑  
善有治功累遷廣漢屬國都尉吏民思德縣人公府  
掾陳盛孫郎中倪定興劉伯郎等共立石表政以刊  
遠績縣北與碭縣分水有碭山芒碭二縣之間山澤

深固多懷神智有仙者涓子主柱並隱碭山得道漢  
高祖隱之呂后望氣知之即於是處也京房易候曰  
何以知賢人隱師曰視四方常有太雲五色具而不  
雨其下賢人隱矣

又東過相縣南屈從城北東流當蕭縣南入于睢

一清  
按睢

水豈可云入睢乎漢志云睢水東至取慮入泗注云睢  
水東南流入泗謂之睢口經止蕭縣非也所謂得其一  
而亡其二矣獲水經云又東過蕭縣南睢水北流注之  
此篇經文入于睢之睢蓋別水支流所匯而非首受蕩  
蕩渠之睢道元故以出入  
迴環更相通注調停之

相縣故宋地也秦始皇二十三年以為泗水郡漢高

帝四年改曰沛郡治此漢武帝元狩六年封南越桂

林監居翁為侯國曰相成也

一清按史漢表並作相成索隱曰在堵陽然則

非沛郡之相

王莽更名之吾符亭也睢水東逕石馬亭亭

西有漢故伏波將軍馬援墓睢水又東逕相縣故城

南宋共公之所都也國府園中猶有伯姬黃堂基當

夜被火左右曰夫人少避伯姬曰婦人之義保傳不

具夜不下堂遂遇火而死斯堂即伯姬殯死處也城

西有伯姬冢昔鄭渾為沛郡太守於蕭相二縣興陂  
堰民賴其利刻石頌之號曰鄭陂睢水又左合白溝  
水水上承梧桐陂陂側有梧桐山陂水西南流逕相  
城東而南流注于睢睢盛則北流入于陂陂溢則西  
北注于睢出入迴環更相通注故經有入睢之文睢  
水又東逕彭城郡之靈璧東東南流漢書項羽敗漢  
王于靈璧東即此處也又云

一清按下有脫文

東通穀泗服

虔曰水名也在沛國相界未詳睢水逕穀熟兩分睢

水而為蘄水故二水所在枝分通謂兼稱穀水之名  
蓋因地變然則穀水即睢水也又云漢軍之敗也睢  
水為之不流睢水又東南逕竹縣故城南地理志曰  
王莽之篤亭也李奇曰今竹邑縣也睢水又東與潁  
湖水合水上承留丘縣之潁陂南北百餘里東西四  
十里東至朝解亭西屆彭城留邱縣之故城東王莽  
更名之曰善丘矣其水自陂南系于睢水睢水又東  
南八丈故溝水注之水上承蘄水而北會睢水又東

逕符離縣故城北漢武帝元光四年封路博德為侯

國

沈氏曰是元狩四年封又按漢表曰邳禹屬朱虛此從史記年表

王莽之符合也

睢水又東逕臨淮郡之取慮縣故城北昔汝南步遊

張少失其母及為縣令遇母于此乃使良馬踟躕輕

軒罔進顧訪病姬乃其母也誠願宿憑而冥感昭微

矣睢水又東合烏慈水水出縣西南烏慈渚潭漲東

北流與長直故瀆合瀆舊上承蘄水北流八十五里

注烏慈水烏慈水又東逕取慮縣南又東屈逕其城

東而北流注于睢水又東逕睢陵縣故城北漢武

帝元朔元年封江都易王子劉定為侯國

一清按索隱曰表在

淮陵王莽之睢陸也睢水又東與潼水故瀆會舊上承

僮縣西南僮陂東北流逕僮縣故城北又東北逕睢

陵縣下會睢水又東南流逕下相縣故城南高祖

十二年封莊侯泠耳為侯國應劭曰下相水出沛國

相縣故此如下也然則下相又是睢水之別名也

清一

按漢志下相縣應劭曰相水出沛國故如下不名下相水道元誤矣東南流入于泗謂

之睢口經止蕭縣非也所謂得其一而亡其二矣

瓠子河出東郡濮陽縣北河

縣北十里即瓠河口也尚書禹貢雷夏既澤雝沮會

同爾雅曰水自河出為雝許慎曰雝者河雝水也清一

按道元敘雷澤甚詳而灘沮甚畧殆以不見班志故耶括地志曰雷夏澤在濮州雷澤縣郭外西北灘沮

二水在澤西北平地元和志云去縣十四里則明有其處矣曾彥和則引爾雅水自河出為雝許慎曰河

灘水在宋灘之下流入于睢水睢水其沮水與晁以道亦引河出為灘濟出為澨求之于韻沮有澨音胡

肅明非之以為汜睢皆出豫入徐於兗無涉又云灘沮皆濟水所出而河不與焉故鄭康成欲破周禮職



方兗州其浸盧維為雷雖通典不從以濟陽盧縣自有盧水高密莒縣自有維水胡朏明又非之以周時徐并于青兗不得越青而東有維濟陽之盧水古不著名周禮多古字霽似盧雖似維也且裴駟史記集解引康成說云雍水沮水相觸而合入此澤中閻百詩曰下一觸字鄭蓋以目驗知之惟雷澤之下流未知何往大抵不南注濟則北注濮濮亦終歸于濟也二水為禹貢著名之水不容不詮要在雷澤之傍者近是道元注甚鶻突且移而被之岐西之雍沮專門名家之學疏繆若此真卷中一話柄也

暨漢

元光之年河水南決漂害民居武帝元封二年上使汲仁郭昌發卒數萬人塞瓠子決河於是上自萬里沙還臨決河沈白馬玉壁令羣臣將軍以下皆負薪

填決河上悼功之不成乃作歌曰瓠子決兮將奈何

一清按漢書此下有浩浩湯湯慮殫為河句方叶韻殫為河兮地不寧功無已

時兮吾山平吾山平兮巨野溢魚沸鬱兮柏冬日正

道弛兮離常流蛟龍騁兮放遠遊歸舊川兮神哉沛

不封禪兮安知外皇謂河公兮何不仁泛濫不止兮

愁吾人齧桑浮兮淮泗滿久不返兮水唯緩一曰河

湯湯兮激潺湲北渡迴兮迅流難蹇長茭兮湛美玉

一清按漢書此下有河公許兮薪不屬薪不屬兮隕衛人罪燒蕭條兮噫乎何以禦水屬字與玉字叶隕

竹林兮隄石菑宣防塞兮萬福來於是卒塞瓠子口  
築宮於其上名曰宣房宮故亦謂瓠子堰為宣房堰  
而水亦以瓠子受名焉平帝已後未及修理河水東  
浸日月彌廣永平十二年顯宗詔樂浪人王景治渠  
築堤起自滎陽東至千乘一千餘里景乃防遏衝要  
疏決壅積瓠子之水絕而不通唯溝瀆存焉河水舊  
東流逕濮陽城東北故衛地帝顓頊之墟昔顓頊自  
窮桑徙此號曰商丘或謂之帝丘本陶唐氏火正閼

伯之所居亦夏伯昆吾之都殷之相土又都之故春

秋傳曰闕伯居商丘相土因之是也

全氏曰帝丘豈  
商丘耶闕伯之

商丘在睢陽非帝丘也王伯厚曰此蓋出于帝王世  
紀之繆一清按寰宇記云衛南縣東北七十里土山

村即古帝丘衛成公遷于此  
鄭氏以商丘當之真屬臆說衛成公自楚丘還此秦

始皇徙衛君角於野王置東郡治濮陽縣濮水逕其

南故曰濮陽也沛公守濮陽環之以水張晏曰依河

水自固

一清按漢書謂章邯守濮陽耳非沛公也所  
引張晏註亦抄變其詞元文是張晏曰依河

水以自環  
繞作壘也

又東逕鹹城南春秋僖公十三年夏會于

臧杜預曰東郡濮陽縣東南有臧城者也瓠子故瀆

又東逕桃城南春秋傳曰分曹地自洮盡曹地也清

按傳大是分曹地自洮以南東傳于濟今鄆城西南五十里有桃城或

謂之洮也一清按方輿紀要桃城亦曰姚城因姚墟而名援神契舜生姚墟應劭曰姚墟與雷

澤相近世稱為姚城是也瓠瀆又東南逕清丘北春秋宣公十二

年經書楚滅蕭晉人宋衛曹同盟于清丘京相璠曰

在今東郡濮陽縣東南三十里魏東部都尉治

東至濟陰句陽縣為新溝

瓠河故瀆又東逕句陽縣之小成陽城北側瀆帝王  
世紀曰堯葬濟陰成陽西北四十里是為穀林墨子  
以為堯堂高三尺土階三等北教八狄道死葬蛩山  
之陰山海經曰堯葬狄山之陽一名崇山二說各殊  
以為成陽近是堯冢也余按小成陽在成陽西北半  
里許實中俗嘯以為因堯城士安蓋以是為堯冢也  
瓠子北有都關縣故城縣有羊里亭瓠河逕其南為  
羊里水蓋資城地而變名由經有新溝之異稱矣黃

初中賈逵為豫州刺史與諸將征吳于洞浦有功魏封逵為羊里亭侯邑四百戶即斯亭也俗名之羊子城非也蓋韻近字轉耳又東右會濮水枝津水上承濮渠東逕鉏丘城南京相璠曰今濮陽城西南十五里有沮丘城六國時沮楚同音以為楚丘非也又東逕浚城南西北去濮陽三十五里城側有寒泉岡即詩所謂爰有寒泉在浚之下世謂之高平渠非也京相璠曰濮水故道在濮陽南者也又東逕句陽縣西

句瀆出焉濮水枝渠又東北逕句陽縣之小成陽城東故垂亭西而北入瓠河地理志曰濮水首受濟於封丘縣東北至都關入羊里水者也又按地理志山陽郡有都關縣今其城在廩丘城西考地志山陽廩丘俱屬濟陰則都關無隸山陽理又按地理志邳都亦是山陽之屬縣矣而京杜考地驗城又並言在廩丘城南推此而論似地志之誤矣或亦疆理參差所未詳瓠瀆又東逕垂亭北春秋隱公八年宋公衛侯



遇于大丘經書垂也京相璠曰今濟句陽縣小成陽縣小成陽東五里有故垂亭者也

又東北過廩丘縣為濮水

瓠河又左逕雷澤北其澤藪在大成陽縣故城西北一十餘里昔華胥履大蹟處也其陂東西二十餘里南北一十五里即舜所漁也澤之東南即成陽縣故史記曰武王封弟季載于成應劭曰其後乃遷於成之陽故曰成陽也地理志曰成陽有堯冢靈臺今成

陽城西二里有堯陵陵南一里有堯母慶都陵於城  
為西南稱曰靈臺鄉曰崇仁邑號修義皆立廟四周  
列水潭而不流水澤通泉泉不耗竭至豐魚筍不敢  
採捕前並列數碑栝柏數株檀馬成林二陵南北列  
馳道徑通皆以磚砌之尚修整堯陵東城西五十餘  
步中山夫人祠堯妃也石壁堦墀仍舊南西北三面  
長檨聯蔭扶疏里餘中山夫人祠南有仲山甫冢冢  
西有石廟羊虎傾低破碎畧盡於城為西南在靈臺

之東北按郭緣生述征記自漢迄晉二千石及丞尉

多刊石述敘堯即位至永嘉三年二千七百二十有

一載記于堯妃祠見漢建寧四年五月

一清按四年當作五年成

陽靈臺碑云建寧五年五月造後漢書靈帝紀以夏五月己巳始改建寧五年為熹平元年故建寧無五年也造碑時尚未知有改元事故碑題仍稱五年鄜人以紀元建寧無五年遂作四年豈得其實乎抑或後人妄更未可知也

成陽令管遵所立碑文云堯陵北仲山甫

墓南二冢間有伍員祠晉大安中立一碑是永興中

建今碑祠並無處所又言堯陵在城南九里中山夫

人祠在城南二里東南六里堯母慶都冢堯陵北二里有仲山甫墓考地驗狀咸為疏僻蓋聞疑書疑耳

一清按隸釋有濟陰太守孟郁修堯廟碑咸宗永康元年又帝堯碑靈帝熹平四年又成陽靈臺碑建寧五年三碑俱云水經有今本祇有漢建寧四年五月成陽令管遵所立碑即成陽靈臺碑也上二碑無之蓋缺失矣洪氏造曰成陽靈臺碑篆額靈帝建寧五年立與堯廟二碑在成陽皆有陰堯葬慶都于成陽名曰靈臺上立黃屋為奉祠之所漢綴其祀至亡新而繼於是廷尉仲定奉請興治郡守審晃縣令管遵各遣大掾助成之案兩漢地志濟陰成陽有堯冢靈臺不明言靈臺為堯冢也章帝紀元和二年使使者祠唐堯於成陽靈臺注引郭緣生述生紀曰成陽有堯陵陵南一里有堯母慶都陵稱曰靈臺据此則

與碑合靈臺有堯母冢明矣集古錄曰按皇覽云堯  
冢在濟陰城陽呂氏春秋云堯葬穀林皇甫謐云穀  
林卽成陽也然自史記地志及水經諸書皆無堯母  
葬處惟見于此碑蓋亦葬成陽也而諸書俗本多為  
城陽獨此碑為成陽當以碑為正金石錄跋尾云成  
陽屬今雷澤歐陽公以為自史記地志及水經諸書  
皆無堯母葬處余按班固西漢劉昭東漢書地理志  
皆曰成陽有堯冢靈臺而東漢志章帝元和二年東  
巡狩將至泰山道使使者奉一太牢祠帝堯于濟陰  
成陽靈臺與章帝紀所載正同帝紀章懷太子注引  
郭緣生述征記云成陽東南有堯母慶都墓上有祠  
廟堯母陵俗亦名靈臺丈母水經注今成陽城西二  
里有堯陵南一里有堯母堯都陵於城為西南稱曰  
靈臺蓋兩漢史所載似以靈臺為堯冢惟此碑與述  
征記水經乃直指為堯母冢爾然水經云在成陽西  
南而述征記云在東南余為潯州同官李堯雷澤人

云冢正在城西南蓋述征記誤路史辨帝堯冢曰堯  
冢在濟陰成陽堯母靈臺在南歐陽文忠公集古錄  
言靈臺碑以為史記地志水經諸書皆無堯母葬處  
粵稽地志及范曄志水經注言堯陵慶都陵明白若  
此惡得云無耶然述征記云在成陽東南今之所識  
乃在城陽西南四十里穀林則古今鐘瑒相出入有  
不同者郭氏所記乃小成陽小成陽在成陽西北五  
十里隸于河南有山曰成陽穀林在其下小成陽以  
山得名乃堯葬母所在有堯冢故名焉文忠跋謂俗  
本多作城陽獨此碑為成陽夫成陽與城陽正自二  
所成陽隸濟陰乃古之成昔成王封母弟于成後遷  
于成之陽遂曰成陽而城陽乃漢齊悼惠王之子章  
所食之國今之兗州  
是矣不得混為一也

雷澤西南十許里有小山孤立  
峻上亭亭傑峙謂之歷山山北有小阜南屬迤澤之

東北有陶墟緣生言舜耕陶所在墟阜聯屬濱帶瓠  
河也鄭玄曰歷山在河東今有舜井皇甫謐或言今  
濟陰歷山是也與雷澤相比余謂鄭玄之言為然故  
揚雄河水賦曰登歷觀而遙望兮聊浮游于河之巖  
今雷首山西枕大河校之圖緯於事為允士安又云  
定陶西南陶丘舜所陶也不言在此緣生為失瓠河  
之北即廩丘縣也王隱晉書地道記曰廩丘者春秋  
之所謂齊邑矣實表東海者也竹書紀年晉烈公十

一年田悼子卒田布殺其大夫公孫孫公孫會以廩丘叛于趙田布圍廩丘翟角趙孔肩韓師救廩丘及田布戰于龍澤田布敗遁是也瓠河與濮水俱東流經所謂過廩丘為濮水者也縣南瓠北有羊角城春秋傳曰烏餘取晉羊角遂襲我高魚天大雨自竇入介其庫登其城剋而取之也京相璠曰衛邑也今東郡廩丘縣南有羊角城高魚魯邑也今廩丘東北有故高魚城俗謂之交魚城謂羊角為角逐城皆非



也。瓠河又逕陽。晉城南。史記蘇秦說齊曰：過衛陽。晉

之道。

全氏曰：按胡三省曰：所謂衛陽，晉者以魏境有陽，晉故稱衛陽。晉以別之。史記秦取魏陽，晉是

也。徑于亢父之險者也。今陽晉城在廩丘城東南一

十餘里，與都闕為左右者也。張儀曰：秦下甲攻衛陽

晉，大闕天下之句。徐廣史記音義云：闕一作開。

一清按此

十一字注中

東之亢父，則其道矣。瓠河之北，又有郟都城。

春秋隱公三年，郟侵衛。京相璠曰：東郡廩丘縣南三

十里有故郟都城。地理志曰：山縣鄉也。

一清按鄉乃縣字之誤

褚先生曰漢封金安上為侯國王莽更名城穀者也

一清按褚表金安上封都成侯漢表同索隱曰志屬  
潁川而地理志無之然金日磾封宛侯宛屬濟陰安  
上之封必與日磾附近山  
陽濟陰又地界相接也 瓠河又東逕黎縣故城南

王莽改曰黎治矣孟康曰今黎陽也薛瓚言按黎陽

在魏郡非此黎陽也

一清按師古註引瓚曰黎陽在  
魏郡非黎縣也道元蓋抄變其

詞

世謂黎侯城昔黎侯陽寓于衛

全氏曰據善長說  
陽似黎侯名誤矣

詩所謂胡為乎泥中毛云泥中邑名疑此城也土地

汙下城居小阜魏濮陽郡治也瓠河又東逕秬縣故

城南地理志曰濟陰之屬縣也褚先生曰漢武帝封  
金日磾為侯國王莽之萬歲矣世猶謂之為萬歲亭  
也瓠河又東逕鄆城南春秋左傳成公十六年公自  
沙隨還待于鄆京相璠曰公羊作鄆字今東郡廩丘  
縣東八里有故運城即此城也

又北過東郡范縣東北為濟渠與將渠會

瓠河自運城東北逕范縣與濟濮枝渠合故渠上承  
濟瀆於乘氏縣北逕范縣左納瓠瀆故經有濟渠之

稱又北與將渠受河於范縣西北東南逕秦亭南杜  
預釋地曰東平范縣西北有秦亭也又東南逕范縣  
故城南王莽更名建睦也漢興平中新允為范令曹  
太祖東征陶謙於徐州張邈迎呂布郡縣響應程昱  
說允曰君必固范我守東阿田單之功可立即斯邑  
也將渠又東會濟渠自下通謂之將渠北逕范城東  
俗又謂之趙溝非也

又東北過東阿縣東

瓠河故瀆又東北左合將渠故瀆上承將渠於范縣  
東北逕范縣北又東北逕東阿城南而東入瓠河故  
瀆又北逕東阿縣故城東春秋經書冬及齊侯盟于  
柯左傳曰冬盟于柯始及齊平杜預曰東阿即柯邑  
也按國語曹沫挾匕首劫齊桓公返遂邑於此矣

全氏

曰事見公  
羊非國語

又東北過臨邑縣西又東平過茌平縣東為鄧里渠  
自宣防已下將渠已上無復有水將渠下水首受河

自北為鄧里渠

又東北過祝阿縣為濟渠

河水自四瀆口出會濟水二瀆合而東注于祝阿也

又東北至梁鄒縣西分為二

脈水尋梁鄒濟無二流蓋經之誤

其東北者為濟河其東者為時水又東北至濟西濟河  
東北入于海時水東至臨淄縣西屈南過太山華縣東  
又南至費縣東入于沂

時即郚水也

音而

一清按二字注中注

春秋襄公三年齊晉盟

于郚者也京相璠曰今臨淄唯有澶水西北入濟即地理志之如水矣郚如聲相似然則澶水即郚水也蓋以澶與時合得同稱矣時水自西安城西南分為二水枝津別出西流德會水注之水出昌國縣黃山西北流逕昌國縣故城南昔樂毅攻齊有功燕昭王以是縣封之為昌國君德會水又西北五里泉水注之水出縣南黃阜北流逕城西北入德會又西北世

謂之滄浪溝又北流注時水地理志曰德會水出昌國西北至西安入如是也時水又西逕東高宛城中而西注也俗人過令側城南注又屈逕其城南史記

漢文帝十五年分齊為膠西王國都高宛徐廣音義

曰樂安有高宛城故俗謂之東高宛也

一清按道元此注是據史

記漢興以來諸侯年表而文帝紀及漢志皆云十六年入史記世家膠西王卬齊悼惠王子以昌平侯文帝十六年為膠西王十一年與吳楚反漢擊破殺卬地入于漢為膠西郡又五宗世家膠西王端用皇世子為膠西王立四十七年卒國除為郡而地理志云宣帝本始元年更為高密國首高密縣豈膠西國廢



復置高密國而改治者與巨洋水注又云高密郡治  
奈特亭世謂之故郡城地志奈特北海之屬縣也後  
漢郡縣皆廢故續志無之其水又北注故瀆又西蓋野溝水注之

源導延鄉城東北平地出泉西北逕延鄉城北地理  
志曰千乘有延鄉縣世人謂故城為從城延從字相  
似讀隨字改所未詳也西北流世謂之蓋野溝又西  
北流逕高宛縣北注時水時水又西逕西高宛縣故  
城南漢高帝六年封丙倩為侯國王莽之常鄉也其  
水側城西注京相璠曰今樂安博昌縣南界有時水

西通濟其源上出盤陽北至高苑下有死時中無水

杜預亦云時水於樂安枝流旱則竭涸為春秋之乾

時也左傳莊公九年齊魯戰地魯師敗處也時水西

北至梁鄒城入于濟

全氏曰時水二支一至梁鄒入濟者其流甚短一東行至鉅定

入馬車瀆者其流甚長別見淄水注中道元所以補經也

非濟入時蓋時來注濟

若濟分東流明不得以時為名尋時濟更無別流南

延華費之所斯為繆矣

汶水出泰山萊蕪縣原山西南過嬴縣南

萊蕪縣在齊城西南原山又在縣西南六十許里地

理志汶水與淄水俱出原山西南入濟故不得過其

縣南也

一清按經自謂汶水過嬴縣南耳不云過萊蕪縣南也

酈之詮詰殆自相伐 從征

記曰汶水出縣西南流又言自入萊蕪國莒路連山

百數里水隍多行石澗中出藥草饒松栢林藿綿濛

崖壁相望或傾岑阻徑或迴巖絕谷清風鳴條山壑

俱響凌高降深乖惴慄之懼危蹊絕徑過懸度之艱未

出谷十餘里有別谷在孤山谷有清泉泉上數丈有

石穴二口容人行入穴丈餘高九尺許廣四五丈言是昔人居山之處薪爨烟墨尚存谷中林木緻密行人數有能至矣又有少許山田引灌之踪尚存出谷有平丘而山傍水土人悉以種麥云此丘不宜殖稷黍而宜麥齊人相承以殖之意謂麥丘所栖愚公谷也何其深沉幽翳可以託業怡生如此也余時逕此為之踟躕為之屢眷矣余按麥丘愚公在齊不在魯川谷猶傳其名蓋誌者之繆耳汶水又西南逕羸縣

故城南春秋左傳桓公三年公會齊侯于嬴成婚于齊也

又東南過奉高縣北

奉高縣漢武帝元封元年立以奉泰山之祀泰山郡治也縣北有吳季札子墓在汶水南曲中季札之聘上國也喪子於嬴博之間即此處也從征記曰嬴縣西六十里有季札兒冢冢圓其高可隱也前有石銘一所漢末奉高令所立無所述敘標誌而已自昔恒

蠲民戶灑掃之今不能然碑石糜碎靡有遺矣唯故  
跌存焉

### 屈從縣西南流

汶出牟縣故城西南阜下俗謂之胡盧堆淮南子曰

汶出弗其高誘曰山名也或斯阜也

一清按高誘曰  
弗其山名在朱

虛縣東北青州之東汶其水東北流入濰見  
下二十六卷道元以牟縣胡盧堆當之誤矣 牟縣故

城在東北古牟國也春秋時牟人朝魯故應劭曰魯  
附庸也俗謂是水為牟汶也又西南逕奉高縣故城

西西南流注于汶汶水又南右合北汶水水出分水  
谿源與中川分水東南流逕泰山東合天門下谿水  
水出泰山天門下谷東流古者帝王升封咸憇此水  
水上往往有石竅存焉蓋古設舍所跨處也馬第伯  
書云光武封太山第伯從登山去平地二十里南向  
極望無不覩其為高也如視浮雲其峻也石壁宵窳  
仰視巖石松樹鬱鬱蒼蒼如在雲中俯視谿谷碌碌  
不可見夫尺直上七里天門仰視天門如從穴中視

天矣應劭漢官儀云泰山東南山頂名曰日觀者雞  
一鳴時見日始欲出長三大許故以名焉其水自谿  
而東瀆波注壑東南流逕龜陰之田龜山在博縣北  
一十五里昔夫子傷政道之陵遲故望山而懷操故  
琴操有龜山操焉山北即龜陰之田也春秋定公十  
年齊人來歸龜陰之田是也又合環水水出泰山南  
谿南流歷中階兩廟間從征記曰泰山有下中上三  
廟墻闕巖整廟中栢樹夾兩階大二十餘圍蓋漢武



所植也赤眉嘗斫一樹見血而止今斧創猶存門閣  
三重樓榭四所三層壇一所高丈餘廣八尺樹前有  
大井極香冷異于凡水不知何代所掘不常浚滌而  
水旱不減廟中有漢時故樂器及神車木偶皆靡密  
巧麗又有石勒建武十三年  
一清按建武是石  
虎年號注誤證永貴  
侯張余上金馬一匹高二尺餘形制甚精中廟及下  
廟五里屋宇又崇麗于下廟廟東西夾澗上廟在山  
頂即封禪處也其水又屈而東流入于汶水  
一清按  
四字義

大  
又東南流逕南

一清按南字義文或漢字之誤  
蓋周明堂與漢明堂為二矣

明

堂下漢武帝元封元年封泰山降坐明堂於山之東北趾武帝以古處險狹而不顯也欲治明堂於奉高傍而未曉其制濟南人公玉帶上黃帝時明堂圖圖中有一殿四面無壁以茅蓋之通水圜宮垣為複道上有樓從西南入名曰崑崙天子從之入以拜祀上帝焉於是上令春高作明堂於汶上如帶圖也右引水為辟雍處基瀆存焉世謂此水為石汶山海經曰

環水出秦山東流注于江

一清按郭璞曰江一作海此江字固誤海字亦非當

作汶

即此水也環水又左入于汶水汶水又西南流逕

徂徠山西山多松柏詩所謂徂來之松也廣雅曰道

梓松也抱朴子稱玉策記曰千歲之松中有物或如

青牛或如青犬或如人皆壽萬歲又稱天陵有偃蓋

之松也所謂樓松也魯連子曰松樞高千仞而無枝

非憂正室之無柱也爾雅曰松葉柏身曰樞鄒山記

曰徂嶧山在梁甫奉高博三縣界猶有美松亦曰尤

徠之山也赤眉渠帥樊崇所堡也故崇自號尤徠三  
老矣山東有巢父廟山高十里山下有陂水方百許  
步三道流注一水東北泂溪而下屈逕縣南西北流  
入于汶一水北流歷澗西流入于汶一水南流逕陽  
關亭南春秋襄公十七年逆臧紇自陽關者也又西  
流入于汶水也

過博縣西北

汶水南逕博縣故城東春秋哀公十一年會吳伐博

者也

一清按左氏傳云為郊戰故公會吳子伐齊五月取博杜預曰博齊邑注所引未備

灌嬰

破田橫於城下屈從其城南西流不在西北也汶水

又西南逕龍鄉故城南春秋成公二年齊侯圍龍

因頃公嬖人盧蒲就魁殺而膊諸城上齊侯親鼓取

龍者也漢高帝八年封謁者陳署為侯國汶水又西

南逕亭亭山東黃帝所禪也山有神廟水上有石門

舊分水 downstream 處也汶水又西南逕陽關故城西本鉅

平縣之陽關亭矣春秋襄公十七年逆賊紇自陽關

者矣

一清按十五字已見上此複矣

陽虎據之以叛伐之虎焚萊門

而奔齊者也汶水又南左會淄水水出泰山梁父縣

東西南流逕菟裘城北

全氏曰此一淄水杜預所云入汶者也鄭樵誤以為萊

蕪之淄王士禰不知而妄非之

春秋隱公十一年營之公謂羽父曰

吾將歸老焉故郡國志曰梁父有菟裘聚淄水又逕

梁父縣故城南縣北有梁父山開山圖曰泰山在左

亢父在右亢父知生梁甫主死王者封泰山禪梁甫

故縣取名焉淄水又西南逕柴縣故城北地理志曰

泰山之屬縣也世謂之柴汶矣淄水又逕郕縣北漢

高帝六年封董濞為侯國

一清按史表作成侯索隱曰屬涿郡地理志涿郡成

縣侯國

春秋齊師圍郕郕人伐齊飲馬於斯水也昔孔

子行於郕之縣遇榮啟期於是衣鹿裘被髮琴歌三

樂之懼夫子善其能寬矣淄水又西逕陽關城南西

流注於汶水汶水又南逕鉅平縣故城東而西南流

城東有魯道詩所謂魯道有蕩齊子由歸者也今汶

上夾水有文姜臺汶水又西南流詩云汶水滔滔矣

淮南子曰貉渡汶則死天地之性倚伏難尋固不可

以情理窮也

全氏曰按王伯厚云列子釋文史記汶與岷同謂汶江也今江邊人云狐不渡

江然則非東州之汶

汶水又西南逕魯國汶陽縣北王莽之汶

亭也縣北有曲水亭春秋桓公十二年經書公會杞

侯莒子盟于曲池左傳云平杞莒也故杜預曰魯國

汶陽縣北有曲水亭漢章帝元和二年東巡泰山立

行宮於汶陽執金吾耿恭屯城門於汶上基塹存焉

世謂之關陵城也汶水又西逕汶陽縣故城北西注



尚貢錐指元和志乾封縣界有五汶源別而流同五汶者曰北汶羸汶柴汶牟汶其一則經流也按鄆注無羸汶羸汶在今萊蕪縣南三十里源出宮山之陰流合牟汶宮山者新甫之別名也山在新泰縣西北津水源出泰山分水嶺即北汶州志謂之整汶在今泰安州南五汶之外有小汶在州東南七十里源出宮山流逕徂徠山南又西入汶水所謂大汶口也羸汶合牟汶故鄆注不言五汶以小易羸斯為當矣又有水出萊蕪縣寨子村流合牟汶者近志指為活又據漢志瑯琊靈門縣有高原山活水所出東北入濰說文水出靈門山世謂之活汶在今莒州界與萊蕪無涉志妄言耳東汶出朱虛縣小泰山北流至淳于縣入濰在今臨洵安邱縣界淮南子曰汶出弗其流入濟高誘曰弗其山名在朱虛縣東是即入濰之東汶言入濟者淮南之誤也一清按五汶之名始于郭緣生述征記曰泰山郡水皆名曰汶汶凡有五曰北

汶嬴汶柴汶浯汶皆源別而流同浯汶遠在瑯琊關  
入泰山郡城近志因之而誤東樵正之是矣乃欲以  
小汶易嬴汶則非考泰安圖志嬴汶與牟汶合自萊  
蕪縣東北流逕縣西南至泰安縣東北之故縣鎮與  
出仙臺嶺水會名曰大汶亦曰塹汶東樵以北汶為  
塹汶亦非又西南流與石汶合石汶者環水也又西  
南流與北汶合北汶者泮水也濟水篇注云泮水出  
分水谿者是也四汶共流而西南小汶水會之小汶  
出新泰縣東北龍堂山西流百二十里入泰安縣東  
南境至縣西南逕徂徠山南故柴城北而合于大汶  
尋其川脉即古柴汶之道柴汶本出梁父縣東西流  
逕菟裘城又西流逕梁父縣故城又西流逕柴縣故  
城又西流邨縣北又西流逕陽關城而西合于汶  
水今梁父縣東之上源已絕而下流僅至古柴城即  
入于大汶不能至陽關城陽關城更在古柴城之西  
然小汶之甚遠其吐納衆亦甚夥倘古有是水道元

無容不詳記之此必溝通之以合於柴汶其後水流既成而柴汶遂為所奪大汶小汶之名皆起于後世彼以合羸牟北石四汶故名之曰大此則專合柴汶故名曰小是五汶者又并而為二以出于大汶口西歷桐城壩又西北歷戴村壩入于大清河即古濟水之故道也蓋羸牟二汶由東達西橫水也北石二汶自南注北直水也柴汶出東北以注西南亦橫水也五汶之名不當去羸以郭記李志皆先記之矣道元不別出羸汶者以羸為汶水發源經流也郭記書中屢引之而此獨不從其說未知何故豈亦以其誤數添汶為不足據耶予有五汶考五篇辭多不載

## 又西南過蛇丘縣南

汶水又西洸水出焉又西逕蛇丘縣南縣治鑄鄉故

城春秋左傳宣叔娶于鑄是也杜預曰濟北蛇丘縣所治鑄鄉城者也

### 又西南過岡縣北

地理志岡故闢也王莽更之曰柔也

一清按地理志本作剛縣故新

莽以柔易稱

應劭曰春秋經書齊人取謹及闢是也杜預

春秋釋地曰闢在剛縣北岡城東有一小亭今岡縣治俗人又謂之闢亭相璠曰岡縣西四十里有闢亭未知孰是汶水又西蛇水注之出縣東北泰山西南

流逕汶陽之田齊所侵也自汶之北平暢極目僖公  
以賜季友蛇水又西南逕鑄城西左傳所謂蛇淵圃  
也故京相璠曰今濟北有蛇丘城城下有水魯固也  
俗謂之濁須水非矣蛇水又西南逕夏暉城南經書  
公會齊侯于下讜是也今俗謂夏暉城蓋春秋左傳  
桓公三年公子翬如齊齊侯送姜氏于下讜非禮也  
是也世有夏暉之名矣蛇水又西南入汶汶水又西  
溝水注之水出東北馬山西南流逕棘亭南春秋成

公三年書秋叔孫僑如帥師圍棘左傳曰取汶陽之  
棘不服圍之南去汶水八十里又西南逕遂城東  
地理志曰蛇丘遂鄉故遂國也春秋莊公十三年齊  
滅遂而戍之者也京相璠曰遂在蛇丘東北十里杜  
預亦以為然然縣東北無城以擬之今城在蛇丘西  
北蓋杜預傳疑之非也又西逕下謹城西而入汶水  
汶水又西逕春亭北考古無春名唯平陸縣有崇陽  
亭然是亭東去剛城四十里推璠所注則符並所未

詳也一清按推璠所注謂京相璠春秋土地名也是注既不引其書何為濫及乎

### 又西南過東平章縣南

地理志曰東平國故梁也景帝中六年別為濟東國武帝元鼎元年為大河郡宣帝甘露二年為東平國王莽之有鹽也章縣按世本任姓之國也春秋齊人降章者也故城在無鹽東北五十里汶水又西南有泌水注之水出肥成縣東北白原西南流逕肥成縣故城南樂正子春謂其弟子曰子適齊過肥肥有君

子焉左逕句窳亭北章帝元和二年鳳凰集肥城句  
窳亭復其祖而巡泰山即是亭也泌水又西南逕富  
城縣故城西王莽之成富也其水又西南流注於汶  
汶水又西南逕桃鄉縣故城西王莽之郭亭也世以  
此為郭城非蓋因巨新之故目耳

又西南過無鹽縣南又西南過壽張縣北又西南至安  
民亭入于濟

汶水自桃鄉四分當其派別之處謂之四汶口其左



二水雙流西南至鹽縣之邠鄉城南魯叔孫昭伯之

故邑也禍及鬪雞矣

全氏曰邠昭伯以鬪雞啟禍昭伯亡後邠始歸叔孫昭子善長

誤春秋左傳定公十二年叔孫氏墮邠今其城無南

面汶水又西南逕東平陸縣故城北應劭曰古厥國

也今有厥亭汶水又西逕危山南世謂之龍山也漢

書五行志曰哀帝時無鹽危山土自起覆草如馳道

狀又邠山石轉立晉灼曰漢注作報山

全氏曰八字注中注一清

按漢志北海郡邠縣師古曰邠即報字而宣元六王傳邠山晉灼曰漢注作報山師古曰報山古作邠字

為其形似瓠耳又通而為狐地理志河東狐誦之狐  
史漢表俱作瓠徐廣曰音胡索隱曰即狐字可證也

山脇石一枚轉側起立高九尺六寸傍行一丈廣四  
尺東平王雲及后謁曰漢世石立宣帝起之表也自

之石所祭治石象報山立石東倍草并祠之建平三

年息夫躬告之王自殺后謁棄市國除何氏曰市在  
宣元六王傳

非五行志也  
善長誤矣汶水又西合為一水西南入茂都澱澱

陂水之異名也澱水西南出謂之巨野溝又西南逕

致密城南郡國志曰須昌縣有致密城古中都也即

夫子所宰之邑矣制養生送死之節長幼男女之禮  
路不拾遺器不彫偽矣巨野溝又西南入桓公河北  
水西出澗謂之巨良水西南逕致密城北西南流注  
洪瀆次一汶西逕郈亭北又西至壽張故城東逕為  
澤渚初平三年曹公擊黃巾於壽張東鮑信戰死於  
此其右一汶西流逕無鹽縣之故城南舊宿國也齊  
宣后之故邑所謂無鹽醜女也漢武帝元朔四年封  
城陽共王子劉慶為東平侯即此邑也王莽更名之

曰有鹽亭汶水又西逕郕鄉城南地理志所謂無鹽  
有郕鄉者也汶水西南流逕壽張縣故城北春秋之  
良縣也縣有壽聚漢曰壽良應劭曰世祖叔父名良  
故光武改曰壽張也建武十五年世祖封樊宏為侯  
國汶水又西南長直溝水注之水出須昌城東北穀  
陽山南逕須昌城東又南漆溝水注焉水出無鹽城  
東北五里阜山下西逕無鹽縣故城北水側有東平  
憲王蒼冢碑闕存焉元和二年章帝幸東平祀以太

牟親拜祠坐賜御劍於陵前其水又西流注長直溝  
溝水竒分為二一水西逕須昌城南入濟一水南流  
注于汶汶水又西流入濟故淮南子曰汶出弗其西  
流合濟高誘云弗其山名在朱虛縣東余按誘說是  
東汶非經所謂入濟者也蓋其誤證耳

水經注釋卷二十四